

光緒山西通志

鄉賢錄十八

錄二之十八

山西通志弟百三十三

旨

賜進士出身頭品頂戴兵部侍郎兼都察院右副都御史巡撫山西提督軍務臣張煦等

國朝 康熙

鄭崑璽字殿光文水人康熙壬戌聯傳進士授三河知縣補  
普甯安化所至以廉能著入爲吏部驗封司主事遷稽勳司  
員外郎文選司郎中苞苴竿牘胥絕遷工科給事中進戶科  
掌印僑寓古寺一室布被紙帳澹泊如故書生論者稱之  
鄭爲龍字令侯文水人癸未翰林簡膠州知州兼攝安邱縣  
興利除弊易瘠土爲沃壤薦升杭州知府以母病請假改調  
漢中府尋以艱歸服闕補蘇州知府調直隸正定府

世宗召至偏殿垂問山西官吏民情甚悉

賜詩章端硯貂裘並克食茶果等物且諭有要事卽行摺奏甫市月升湖南糧儲道尋調直隸通永河道所在政績丕著年八十有三卒

成元震字東權文水人康熙戊子武舉選授徐州協標守備雍正七年署河標右營遊擊是歲大水力護運隄尋隨兵部侍郎馬爾泰辦淮陽賑務題授常州營遊擊常之宜荆二邑逼臨太湖素稱盜藪元震條陳練兵弭盜十餘則總督趙稱善檄通省照行乾隆元年升江南提標中軍參將兵米歲十萬石親督收放力革巡鹽陋規尋遷江甯副將署壽春總兵所在盜息民安七年入覲

上顧左右大臣曰此誠實能辦大事人也卽授兗州鎮總兵八年調江西南贛鎮因

召見備詢家事以親老改授河南南陽鎮適河州有回民交  
爭之案奉

旨移鎮其地推誠以蒞不數月漢夷帖然十四年晉甘肅提  
督薪營馬孳生溢額者悉以歸公又買駝節省芻豆銀二萬  
餘金亦奏交藩庫在邊二年諸部晏然準夷交易者皆相誠  
無干令以事降調潮州總兵

陛見復授兗州鎮是夏河湖漲溢高家堰隄決率兵弁日夜  
露處運夫過每十里爲備糗糧慰勞之夫役踴躍趨工尋調  
江西南昌鎮二十二年

上南巡召見

賜宴賞內緞荷包諸物居五年以疾奏懇回籍調理未幾卒  
年七十八成震狀貌魁梧雙眸炯炯博涉羣書在兗時值同

官公譙各賦一詩以武職未習辭不獲立成一絕云一別蒙  
山數千秋幾番得意幾番愁

君恩復命來東魯山色依然我白頭閔座爲之搗筆三典武  
闕麾下偏裨官至總鎮者五人幸際昇平終身未臨大敵時  
以爲福將云

孫嘉淦字錫公一字懿齋興縣人世蓋孫也父天繡以義俠  
聞鄉里伯兄楨淦爲同縣趙氏子所戕論抵矣貨縵且脫罪  
父憤欲死乃夜入獄刃其仇與仲兄鴻淦一晝夜行三百餘  
里至會城門啓而入遭貨甌甌者仆焉盡毀其器訟於縣頌  
繫待決已而興縣人喧傳孫氏兄弟殺人捕者至令解之曰  
安有越一宿而能殺人三百里外者乎事竟得釋時嘉淦年  
十八矣家貧日樵采夜歸讀書康熙五十二年成進士官檢

討游朱文端張清恪兩公門研精理學以躬行爲本問母病乞假於院長不待報徑歸尋丁母憂服闋還官

世宗卽位上封事三曰親骨肉曰停捐納曰罷西兵

上召諸大臣示之責掌院學士曰爾翰林乃容此狂士學士叩頭謝朱文端在側徐對曰此生誠狂然臣服其膽良久

上大笑曰朕亦不能不服其膽卽

召對授國子監司業它日

世宗手指示九卿曰朕卽位以來孫嘉淦每事直言極諫朕不惟不怒且嘉悅焉爾等當以爲法雍正二年典江西鄉試三年提督安徽學政就遷祭酒尋調順天學政奏革一切供應賜養廉銀歲四千兩及京城官房七十餘間爲試院每試士時必與諸生講身心性命之學纂近思錄輯要授之曰此聖

學階梯也歲滿泣祭酒任先是官司業時上言學校之教宜以經術爲先請令天下學臣選拔諸生貢太學九卿舉經明行修者任助教一以經術造之三年考其成舉以待用時方急西事未行也至是復申言經術必可成人才必可得請廣學舍增諸生餼廩

世宗薨之令戶部歲給銀六千兩除官房三百餘間別爲南學嘉塗嚴立課程五日一會講一時人才稱盛六年權順天府尹疏劾古北口監督傅紳私徵官稅論如律父憂歸

賜治喪銀千兩乃竭家貲營葬而以

賜金建宗祠置祭田服未闕以順天府尹

召晉工部侍郎部吏倚奏銷爲奸利乃頒工程科比而先以物價咨直省大吏臨期料復披籍而已吏相弔於家八年充

會試副考官轉刑部侍郎兼署吏部侍郎凡累遷官皆兼祭酒如故前後垂十五六年會引見教習不稱旨嘉淦持之堅

上怒曰爾能保若曹不以貪庸敗乎擲筆令自書狀嘉淦持筆欲下侍臣呵曰汝敢動

御筆乎嘉淦悟捧筆寘

御榻上免冠頓首曰

上用筆臣不敢捉

上曰爾固猶知有君父耶

命鎖交刑部議罪尋議大不敬論斬

上意已解諭大學士曰孫嘉淦太戇然不愛錢可銀庫行走時果親王方總部務意其或怨望不事事乃出不意至庫所見



嘉途方僂僕稱量與吏卒雜坐均勞苦王歎異

上亦愈重之

命署河東鹽政奏減鹽政及運司養廉銀增弓兵月餼

高宗御極

召爲吏部右侍郎遷左都御史上三習一弊疏謂耳習於所聞則喜諛而惡直目習於所見則喜柔而惡剛心習於所是則喜從而惡違三習既成乃生一弊喜小人而厭君子云云疏入

上嘉納宣示焉乾隆元年典試江西尋遷刑部尙書總理國子監事時

上方嘉意太學肄業生凡數千人因奏仿胡安定遺法用經義治事分條教授於是人知實學興起者尤眾三年轉吏部尙

書典順天鄉試以尙書總督直隸會水災奏撥山東穀三十萬石由海運建畿輔以濟饑民引水溉田共開渠五百八十有奇使溝水迤道道水通河河水通淀水害去而水利以興晉州小兒被殺同村紀某衣污豆汁有司誤爲血刑訊誣服最後正定守陳浩來白而句決之

旨已下爲奏雪之又奏直省酒禁太嚴以日用飲食之故使天下騷然非政體也疏入而禁弛又奏給旗人屯田墾治古北口山海關外荒土數萬頃尋晉太子太保五年奏永定河改歸故道各工俱竣

上嘉之又奏裁直隸河道總督而責成各道部議從之六年調湖廣總督疏言治苗之法於各寨中立頭人爲寨長一崗中取頭人信服者爲崗長使約束而統於縣令湖南巡撫馮光

裕開橫嶺三洞議者以路險欲棄之嘉淦親履勘越嶺數十重有地曰長安彌望皆沃野度不守且爲盜窟煽連鎮守乃奏設參將領兵鎮守羣崗肅然居亡何調撫福建以前訊糧道謝濟世事不實免

命修順義縣城工贖罪九年冬起宗人府丞明年遷左都御史又明年京察自陳乞休許之既歸結茅城東石堠山掩關習靜將終老焉十四年復以副都御史

召直上書房十五年遷兵部侍郎晉工部尙書明年典會試賜第東城十七年典順天鄉試九月以吏部尙書協辦大學士明年春自以年老請解官專直上書房不許其年復典順天試初嘉淦在翰林有春秋義行世久之瞿然曰吾學無辰得柰何妄測聖經遂毀之晚歲侍經筵直上書房嘗從容言

諸

皇子方研習經義朱子詩集傳過矯呂氏之說於鄭風悉指為淫奔微有可議臣不揣昏眊欲有所述請裁於

聖意以補前賢之缺憾

上許令日進講義一篇先成詩義折中若干卷經

御筆刪定者十六七次命作易解彖爻甫畢而病

上命皇子臨視中使御醫相望於道十八年十二月十六卒年

七十有一

上聞軫悼遣使奠茶酒

賜銀千兩治喪謚文定嘉淦久負直聲屢躓屢起晚年望愈隆中朝略有建白天下人咸曰得非孫公邪其以副都御史召也所過鄉民聚觀至傾村堡以出擁遏馬首不得行明年

江西衛千總盧魯生僞爲嘉淦奏葉累萬言指斥

乘輿徧劾大學士鄂爾泰張廷玉徐本尙書訥親等傳播遠近事聞

上震怒下所在窮治於公一無所問公惶恐不自安語人曰

先帝及

今上嘗戒我好名今獨假名於我殆生平好名之累未盡有以致之以是歎君之明而老臣之負燬已久也自此食不甘寢不暝益自務斂密所朝夕獻替者莫得而聞焉屢奉獨對賞資在百寮之右生平以至誠待人白居鄉至立朝不作一欺人語僚屬有過必先誠論不悛乃劾治之所奏劾必直告無隱有可原未嘗不爲昭雪也既卒

上謂近臣曰朝中少一正人矣歎息久之居恒以八約自誠曰

事君篤而不顯曰與人恭而不驕曰勢避其所爭曰事止於能去曰功藏於無名曰言刪其無用曰以守獨避人曰以清費廉取皆生平得力處也子三次孝愉官至直隸按察使康忱字子丹興縣人幼孤事繼母以孝聞舉甲午鄉試第一戊戌進士翰林院庶吉士改吏部主事累遷兵部武庫司郎中以勤敏受朱文恪公軾知薦忱廉能堪任民事時右江道黃州守兩缺並出

**世宗**以巡道事簡康忱宜任繁劇遂授黃州府知府抵任甫其月丁內艱

特旨奪情留任守制忱益感激自奮勵廉隅一切陋規供派裁割不遺力黃人號曰康青天巡撫王士俊稱爲楚省廉能第一性嚴介孤潔人不敢干以私黃岡令劉某爲蜚語所中

爲申雪事得寢劉謁謝乃厲聲斥之卒以勁直忤總督被劾  
罷歸杜門教授自奉淡泊有寒士所不堪者邑令陳雅敬之  
造訪竟不一面也著有友霞詩鈔行世

郭文雄陽曲人以恩貢知崑山縣邑稱富饒文雄一介不取  
卒于官無以爲斂士民重其廉葬於崑立廟祀之

張旺字月宇興縣人少能挽十五石弓左右馳射束髮從軍  
爲廣東將軍何某所知積功題授守備三藩之變從援漳州  
復廣州並著殊績調入閩勦海寇總督姚啓聖題授督標左  
營遊擊及議征臺灣軍門不習水師旺獨率支軍復十九寨  
從靖海將軍施琅平金門廈門諸島以功授左都督給拖沙  
喇哈番題補提標中軍參將尋授澎湖副將

聖祖仁皇帝召見暢春苑

命內閣記名越四年授江西南瑞總兵會兩江總制傅請調  
南領總兵從之旋升江南提督踰年調福建水師提督又調  
廣西

賜御書持重二字扁額御弓一矢五涖任復

賜御書武略傳家四字扁四十年勦廣東八排明年又勦  
湖廣紅苗叢箐峻嶺輒先登精悍如少年時卒

贈太子少保

賜祭葬如例

閻若璩字百詩太原人五世祖居淮安後改歸原籍父修齡  
平生慎行檢以詩名若璩幼口吃性頗鈍讀書千百過不能  
熟年十五冬夜讀書寒甚漏四下堅坐沈思心忽開自是穎  
悟絕人是歲補學官弟子一時名士如李太虛方爾止王子



一杜于皇輩皆折輩行與交年二十讀尙書至古文二十五篇卽疑其僞沈潛三十餘年盡得其癥結所在作尙書古文疏證八卷康熙元年遊京師龔尙書鼎孳爲之延譽由是知名十七年

召試鴻博不第在都門與汪編修琬交汪著五服考異若琰糾其謬數條徐尙書乾學歎服延爲上客每詩文成必屬裁定曰書不過問先生曰詭謬百出合肥李天馥亦言詩文不經百詩勘定未可輕示人及徐奉

勅修一統志開局洞庭東山若璩相從最久徐手輯其緒論曰閩氏碎金生平於地理尤精審凡山川形勢州郡沿革歷如指掌少讀孟子疑滕定公薨使然友之鄒問孟子慮緩不及事及長親歷其地乃知故滕國城在今縣西南十五里故

邾城在今鄒縣東南二十六里相去僅百里故朝見孟子而暮卽反命也因撰四書釋地四卷釋地餘論若干篇又作孟子生卒年月考嘗言孔門從祀顏曾之外當廣爲十二哲德行三人閔子騫冉伯牛仲弓言語三人宰我子貢有若政事三人冉有季路公西華文學三人子夏子游子張以論語孟子證之確不可易其後有子子張皆升祀實因若璩議始而尙書古文及孔傳之僞遂今羣奉爲定論云

世宗皇帝在潛邸聞其名手書延至京師握手賜坐呼先生曰索觀所著書每進一篇未嘗不稱善疾革請移就外留之不可乃以大牀爲輿上施青紗帳二十人舁之出安穩如牀簣不覺其行也康熙四十三年六月卒年六十有九

世宗遣官經紀其喪親製輓詩四章有三千里路爲子來之句

復爲文祭之有云讀書等身一字無假孔思周情旨深言大  
愈謂非若璵不能當也其學長於考證遇有疑義反復窮究  
必得其解乃已於詞科五十人中獨許吳志伊之博覽徐勝  
力之強記於李天生謂其杜撰故事汪茗文謂其私造典禮  
劄記中多徵文時賢如王阮亭魏叔子喬石林朱竹垞何義  
門皆不免譏評所服膺者曰黃太沖顧甯人然於明夷待訪  
錄指其訛謬者不一甯人出日知錄相質卽爲改訂數條甯  
人虛已從之又著潛邱劄記毛朱詩說及日知錄補正喪服  
翼注博學掌錄宋劉攽李燕馬端臨王應麟四家逸事諸書  
詩有眷西堂諸集子泳官中書舍人有文名

申玉衡洪洞人康熙癸卯舉於鄉授廣東河源縣知縣居心  
仁厚及判事明決剛毅蒞任數年催科撫字惠愛及民發奸

摘伏訟獄無遁情初粒山有盜時出焚掠良民屢受其害有司弗能制玉衡至詳明上憲會同營弁身先士卒直搗其巢生擒渠首數人餘黨悉散由是有召父杜母之稱尋卒於官縣民建祠祀之上官捐資給道里費歸百姓哭送者塞途王錫韓字季侯太平人庚子舉於鄉甲辰成進士令直屬之固安守正不阿儉素自處胥吏皆凜法奉公無敢稍擾於鄉戊午分枝京闈得人最盛一時譽滿長安刻有文稿行世卒祀鄉賢

范錫鼎字彪西洪洞人康熙六年進士性孝友究心濂洛遺書闡明絳州辛復元全之學養母不仕河汾人士多從之受經十八年舉博學鴻詞科不出奉

溫旨賜御書山林雲鶴四字士類榮之家居立希賢書院置

田以贍學者四十二年

聖祖西巡迎

駕進理學備考三十四卷剽取辛氏全孫氏奇逢熊氏賜履張氏夏黃氏宗羲諸家之說附以己意

上命留覽時陳文貞公廷敬扈從賦詩有曰歸來屬車上猶指少微星謂鑄鼎也陸清獻公隴其當與以書曰夙聞山右辛復元之名而未見其書承乏恆陽幸與山右接壤則又聞先生出處不苟守禮謹嚴蓋今之辛復元也且盡刊行辛書大有功於世道辱以見示不敢私於篋衍將攜以南歸徧告鄉後進俾知太行之西龍門之東復有大儒出其間王冲淹薛敬軒之遺風未墜相與討論而傳習之爲惠不亦多乎其推重如此所著五經堂文集語錄又繼其父芸茂作續垂棘編

及三晉詩選行世

高向台字泰階翼城人康熙丙午鄉薦丁未進士初授中書以父老請歸尋補嚴州同知嚴境苦盜向台首擒其魁餘黨解散嚴人立祠祀之薦升江甯知府清介自矢頓革繁華之俗以母老請終養民挽留之不得母亡以痛戚搆疾卒

劉若鼎字敬菴臨汾人幼耿介好讀書工文王子中順天鄉試任新城教諭遷長壽知縣廉而有惠政治行舉蜀中第一人爲工部主事未兩月

待授四川道監察御史巡視南城豪猾斂跡久之出爲貴州糧驛道適都勻苗變督撫計安輯而難其人以命若鼎若鼎單車就道至則開陳大義且明示禍福苗民感泣稽首就撫訖事不戮一人未幾內升光祿寺少卿遷順天府府丞再遷

大理寺少卿所在胥有聲績年六十四卒於官

許克猷字壯其襄陵人性好理學探索微奧義旨貫徹登丙辰進士授內閣中書與修一統志遷刑部主事能平允大獄調吏部文選司主事銓政秉公門無私謁恭謹端方都下推重沒之日囊橐蕭然至不能歸里祀鄉賢

王奐曾字元亮太平人丙辰進士歷官至湖廣道監察御史癸酉主試廣東賦性正直學有根柢所至必興利除弊立朝風采卓有可觀如上儲訓正封典論閉糴等疏剴切指陳公忠耿直罔計利害及罷歸栽培後進周卹窮困杜門養高邑宰罕見其面有旭華堂文集行世

邢以愨字欽哉襄陵人庚午舉於鄉爲人恬雅工書任永寧州學正教士有方以疾沒於官祀鄉賢

張纘字禹服襄陵人甲戌進士授內閣中書升禮部祠祭司主事天性孝友從叔母無嗣奉之終身善處鄉黨桑梓問蒙德甚多稱爲倫紀完人居官遇事謹密中正不阿乙酉典試廣西名雋搜羅無遺以衡文跋涉之勞卒於京邸朝野惜之祀鄉賢

張暉樞字光辰曲沃人天性孝友博學能文登丙戌進士初官齊河令抵任問民疾苦廉知劫盜數人擒其魁竄之法縣舊通漕運民困轉輸爲力請當事改官運士民勒石頌之雍正初行取引

見稱旨有張暉樞端方可用之諭擢戶部員外郎尋升郎中出守永州府未三月擢江南驛鹽巡道督龍江西新二關稅以廉潔著入補禮部郎中遭憂歸不復出居家簡樸類寒素



好讀書至耄不倦邑人士多所造就學者稱止園先生年八十有二卒

崔致遠字靜君曲沃人性剛介讀書識大節以丙戌進士官四川大竹令撫瘡痍戢強暴興學勸農風土丕變山樹突生白蠟民利賴之異政播遠近行取入都竹民扳轅泣送盈途由吏部主事屢遷吏科掌印給事中緣疏科臣事

世宗以前明楊繼盛擬之尋遷兵部員外郎憂歸補官後爲浮議所牽羅重辟事白減戍艾湖潛心易理居十年遇赦歸著有易注洪範傳行世詩經釋義微道堂集藏於家七十八歲卒

呂猶龍字爾霖曲沃人隸漢軍旗籍康熙中起家平湖令潔已愛民不避勞怨甫二載以報歸時庫帑虛懸逆累未清民

感其德請於官置簿用鈐櫃收於廟願者聽一時士民爭先踴躍數日而集猶龍泣止之不能得卒於補帑外絲毫無所受服闋補岑溪調博白旋牧遂州守宣化由監司歷藩臬積正自守一如令平湖時五十四年奉

命撫閩值朱一貴反陷臺灣全省震撼總督滿保親督標兵星赴廈門凡糧餉軍需一切策應事宜猶龍相機調度甫七日而全臺平一貴授首先是猶龍屢以勦撫事宜飛摺奏具蒙

旨嘉獎及事平改撫浙江浙江故猶龍宦遊地聞其來歡呼如得慈母婦孺皆引領願見卒以勤勞致疾甫抵任而卒裴倅度字晉武曲沃人由附貢官刑部主事進員外郎遷戶部郎中四十九年出守雲南澄江府職再滿調廣南府踰年

擢河東鹽運使尋改兩浙五十九年遷湖北按察使踰年升  
湖廣布政使雍正元年擢江西巡撫四年遷戶部侍郎留巡  
撫尋授左都御史以事罷歸雲南五年釋歸年七十三卒性  
明敏廉勤有幹略敷歷中外所在有聲嘗奏移湖口關權於  
九江以恤商販革里長糧催行滾單法以便民輸南昌一府  
糧額浮多久爲民病奏請豁免銀七萬有奇閩廣民流寓江  
西入山搭棚墾種靛煙謂之棚民良匪雜處往往結黨滋事  
查得萬五千餘戶編戶造冊按年入籍自是甯州萬載諸山  
帖然械鬪之風以絕其後總督查弼請開銅塘山俸度力陳  
其不便封禁如初江右民惠之

臧爾心字子端太平人康熙辛卯舉鄉試第一癸巳成進士  
官翰林檢討旋以終養歸辛丑歲歉餓殍相望鬻產糶粟賑

之會廣學額謀之邑令張詳請得升爲大學士氣奮揚皆其力也主講書院治經有法登鄉會榜者多出其門性耿介里居數十年足不履公庭品學爲邑人所推重子茂樸茂猷姪茂生茂裕相繼登賢書

張光燦字文垣浮山人廩貢考授教諭性純孝早喪母事繼母秦氏色養兼至讀書樂道潛心理學以躬行實踐爲務篤於鄉黨凡邑中公務竭力獨辦人有以急難告者輒轉應之貧不能償輒焚其券每遇歉歲變產賑飢存活甚衆設義學以教里中子弟多所造就至今傳誦不衰祀鄉賢

趙汝斌字再郁岳陽人貢生由甯晉令升河南開封同知佐政公廉大著循聲宰甯晉時尤多政績士民爲刻芹宮頌德詩以紀其美卒祀名宦及本籍鄉賢

韓象起洪洞人由監生任福山知縣內擢戶部主事累遷員外郎中旋授江西驛鹽道歲饑航粟十萬石賑濟淮揚刻日立至後攝理藩篆捐俸供給鄉試崇祀南昌名宦祠工詩著有汎舟草及詩詞若干卷

張珪字峻公浮山人少孤事孀母先意承志敬養無間家素裕以任恤爲懷康熙辛未歲蝗發錢數十萬令鄉民徧捕計斗償值其貧者復賑以米遂不成災以貢選潞城訓導寒士多所造就拙棲霞知縣方赴官而母罹地震之變茹痛二十餘年無復宦情後以部檄強起再補鄆縣革陋規建義學捐循善良抑錫豪強訟至立決值編審力祛夙弊盡除老弱孤獨在官三年政教大行以病乞歸去之日老幼攀轅泣送百里外建祠祀之家居睦族敦鄰喜扶持土類獎掖後進設清

河書院立文明社延名宿有文望者主之集才士課以文遇鄉試皆資以行辛丑壬寅比歲大祿捐米六百餘石以賑生平所焚畫指券累數千金邑人待以舉火者無慮數十家年七十三卒鄉黨思其德建祠以祀焉

劉業長洪洞人由貢生考授鑲藍旗官學教習官刑部員外郎遷兵部車駕司郎中奉差盛京江南審理刑獄並河南賑濟不避勞怨覆命皆稱

旨特簡高州府知府旋調寶慶府捐廉充公葺學修城百廢俱舉以最擢糧儲道調雲南鹽驛道時鹺政笏如抵任後釐剔諸弊歲增鹽課萬餘金未幾兼攝藩篆適逢有撥兵協濟進藏之

旨籌畫盡善甚爲總督鄂所倚任就遷按察使丁外艱得

山陰縣志卷一 下三十三 列傳第一  
五  
旨在任守制額請始克回籍經理喪葬以哀毀卒年四十有

孟世泰字紹孔滿洲籍臨汾人由內宏文院編修署武昌道  
事遷河南按察使再遷貴州布政使補江西布政使人爲鴻  
臚寺卿遷大理寺卿世泰饒智畧稱一時勞臣在楚尤著吳  
逆亂以詞臣効力行間垂十年肇劃動中機宜比署武昌道  
時賊敗黠者爲緩兵計佯乞降世泰知其詐迫之至營諭以  
利害賊遂解甲去通城民聚黨劫掠議進勦世泰力沮之輕  
騎詣縣具述朝廷威德委曲宣諭眾咸泣成稽首聽命遂按  
治渠魁如法解餘黨俾胥歸業楚人亟稱之年八十二卒  
仇昌祚字振先曲沃人語訥訥不出口而性特鯁確初以恩  
貢授鄆陽府通判時郝搖旗作亂大軍會勦有轉餉勞遷湖

州府同知朝正返將抵潮聞總兵劉進忠叛急返程鄉而中途爲邏者所獲繫解賊巢逼受僞職昌祚引錐自刺血流被體不死餓十二日氣支綴裁屬猶不死乃札絕賊曰昌祚固同知潮者知有潮不知有他生死惟所命之賊遣黨來伺終日不發一語以瘖報賊意少解由是羈賊巢者三年間札賊曰若今祇圖富貴耳富貴有道何不捨其魁俘之闕下歸身司敗朝廷寬大將有通侯之賞富貴可翹足而待無何王師勦漳潮進忠遂解甲歸降亦昌祚之有以誘其衷也潮平康親王以聞得

旨仇昌祚克篤忠貞堅守臣節從優議敘授惠潮兵備道乃條上便宜七款爬搜利弊期與小民休息嶺海之間頌聲丕作而旋以艱歸久之卒潮人思其忠築樓祀之曰鐵漢



衛台揆字枚吉曲沃人嘗築愚谷藕華莊故自號南村以父  
周允任兵部左侍郎承官生尋改叔大學士周祚蔭除順天  
府治中遷兵部武選司員外郎進職方司郎中時滇逆初平  
稽核功賞無濫無枉洋犯浙江趙士相江南高子因二十六  
人朝鮮以干海禁繫還諭如何難婦江西周環姐爲甯古塔  
卒所掠守義不辱夜走三河台揆訊二十六人覈其沿海計  
懋遷釋不問處環尼菴內下檄西江促其舅攜以歸母喪闋  
補武選清吏司郎中出知福建漳州府苦旱齋沐修雩祀禁  
緣峭壁躋南山之巔雨如注復仿平糶法開積貯倉減市價  
之半以蘇民困是歲荒不爲災漳人海和尚潘丞相豪猾不  
逞悉抵法廣人羅成嘯聚殲渠魁赦育從虜境內外胥安堵  
焉調臺灣知府臺灣孤懸海外番漢雜處稱難治台揆先整

簡自吏胥馭下極嚴人不敢名一錢調和兵民咨總兵李世  
臣慎無交相袒護互有輕重世臣然之臺灣知縣陳瓊嘗條  
列應行事宜爲裁定十二款命鳳山諸羅諸縣永爲遵守又  
以番雖殊俗然亦可漸習禮義因立賞格使通事翻譯

聖諭

日爲演說俾與華人同風番童能讀書習字許應童子試  
仍給彩給鼓吹導送本社期年番俗一變遷兩廣鹽運司副  
使以病請致仕卒於家台揆嘗謁楚督郭世隆世隆曰吾知  
君不如梅中丞銷吾嘗言撫番以寬治漢以嚴君雅得治體  
而中丞曰其大者尤在得十一營歡心以固海疆也

崔繩武蒲州人癸卯舉人知如皋縣前令三人並以滯征罷  
官不能歸久羈邑中繩武至知積逋之弊本由里胥於是革  
去之更爲立法數年課未入者悉償於是三令者得釋然去

縣歲有修戰船之役民當之產立破繩武上請大府寬爲之期民困遂紓舊例蘆洲在江上者官丈其地以徵稅凡溝渠廬舍皆丈取焉名之曰丈增繩武獨去之民並感德立祠祀焉子偉觀壬午舉人任阜平令亦有治聲

衛既齊字伯嚴猗氏人副使紹芳子也幼端謹弱冠舉甲辰進士選翰林院庶吉士散館授檢討同考庚戌會試應

**詔**陳直言尋外補霸州州判攝固安永清平谷篆有循績艱歸服闋赴部超擢山東布政使涖政廉潔郡邑上賦吏以貼平羨銀進斥還之歲饑捐穀捐衣建厯山書院以課士再護撫篆清八十餘案釋無辜數百人擢順天府府尹又擢都察院左副都御史疏請賑山陝旱蝗改右副都御史巡撫貴州會黎苗以變聞具疏檢舉逮京候訊謫戍黑龍江日坐土室中

手一編踰年放還後復

命修永定河委培高堰督工不少輟卒於淮上

喬士谷字德元猗氏人性英毅博覽羣書丙午丁未聯雋進士授內閣撰文中書分枝順天鄉試升工部主事歷員外郎遷禮部郎中並以情愼稱督學江西勵士行崇經術正文體一時風氣彬彬稱盛白鹿洞爲先儒講學地擇校官學行兼優者主之聚生徒肄業置田供廩儉事竣督撫交薦請留再任部議以參議道需次平生內行純摯與人交緩急相濟矜孤恤寡樂善不倦明達有遠識爲鄉先生祭酒焉子雲名丁丑進士歷官奉天府府丞雲閣雲載雲綬俱舉人雲瞻副榜孫溥棗溥栗溥棠俱舉人

邵嗣堯字子昆猗氏人中癸卯鄉試庚戌成進士知臨淄縣

上巳... 卷一百三十一  
艱歸補柏鄉縣爲忌者所中落職久之以薦授清苑縣入爲  
江西道監察御史調直隸守道又以參議道提督江南學政  
卒於官嗣堯性廉介不畏強禦遇事寔發棧激勢要憚之在  
柏鄉魏大學士裔介其座主也家人間罹法嚴治不少貸魏  
公賢之旗丁毒毆子錢家入縣庭猶揮拳不輟怒繫之獄移  
文都統訊主者主者不敢承具論如法歲饑或言勒積粟家  
出粟則曰人惟不積粟故歲饑輒束手吾方斲令積粟家獲  
厚利何勒爲異日有蠲粟五十石者已而蠲滋眾歲不爲災  
盜殺人境上捕得以疾斃於獄忌者嗾撫軍糾之士民走上  
官辨枉數十百爲羣而盜子亦言父實斃於疾魏總憲象樞  
時巡畿輔力白其事撫軍深悔之在清苑屢斷疑獄任御史  
疏請發倉米平糶又疏飢民多賣子女祈準贖還任守道嚙

冰囀雪暑舍蕭然嘗以協理運米單車走秦楚數千里見佛  
總制倫力言水陸胥弗便事獲寢先是爲御史時

聖祖嘗謂廷臣曰如陸隴其邵嗣堯做學道定不賣秀才隴其  
嗣堯同年生也至是江南督學缺

特命嗣堯以參議道行學院事蓋異數云嗣堯泣任苞苴竿牘  
無敢至前試三郡疾卒自製斂衣朝服外表裏胥布也常州  
士爲醵金築祠於江陰試院之左

吳雯字天章蒲州人初隱居中條山之玉溪李義山故里也  
後遊京師未知名漁洋尙書見其詩奇賞之待漏朝房誦其  
句於葉初菴閣學葉下直卽命駕造訪康熙己未舉鴻博馮  
相國溥以楚索詩要大書二絕句應之其坦率如此卒以不  
遇不悔也遊燕趙齊魯吳越秦楚足跡半天下晚年買圃鄭

谷之口有竹數百挺黃梅數十株橘三株中作草堂面雷首  
肘太華悠然自忘其老趙秋谷謂其詩才特超妙其鄉自元  
遺山後一人而已王尚書則謂漢魏以來二千年間詩家號  
爲仙才者曹子建李太白蘇子瞻三人耳

本朝作者如林獨以仙才許雯焉著有蓮洋集行世光緒中  
巡撫張建令德書院於會城以雯與傅山閣若璩范鎬鼎合  
祀爲四徵君祠皆已未薦鴻博

國史採入儒林文苑傳者也

王建表字粹修虞鄉人丙午武舉乙丑成進士授四川越巂  
衛守備以軍功階明威將軍衛承明季生齒寥落建表命民  
金馬山下引水灌田又於山麓設置義學教授兵民子弟比  
歸時家皆殷實人知敬學卒年七十雍正中有司請入鄉賢

王應元字仲復猗氏人甲戌進士歷金州推官升監察御史嘗以本縣丁數缺額徭役重累疏請歲減丁銀二千四百兩已丑庚寅間萑苻竊發大兵撲滅而餘孽不悛流毒地方爲白於當事翦之一方安堵邑人以其惠洽桑梓也祀入鄉賢祠而金州名宦亦祀焉子子信兵部郎中子穀子蒲歲貢子纁上林丞

荆文康字佐平猗氏人長厚醇謹與物無競事母撫弟因心孝友由庚辰進士授郟城令甫下車值歲饑不俟申報開倉貸粟至秋民爭輸倉如額歲不爲災當事稱之邑紳劉某之弟因命案繫獄累年嘗暮夜餽千金峻卻之尋察其枉力白於當事得釋諸生李某家兩婢夜爲盜殺盜逸不能自白廉得其實力爲昭雪邑有磨山湖每秋夏水漲行人苦之爲砌



石堰四十餘里人不病涉在官七年內升主事假歸居鄉尤多行義子嚴恂乙酉舉人

喬于瀛字子登猗氏人少穎悟書過目成誦由庚辰進士授遷安令練達有爲內擢吏部主事歷考功員外卽驗封卽中皆以廉勤稱補廣西右江道冰蘖自持力任艱鉅撞人監章保負固拒捕督撫議用兵于瀛持不可請自行勸諭撞人感泣事遂平泗城土府岑映宸以查邊弄兵地方騷動事聞奉旨嚴勘成以土兵狂悍安籠瘴惡無敢任者于瀛毅然請行映宸聞其至手額曰喬公仁人我輩其生矣相率輸誠而于瀛竟以觸瘴致疾歸沒於署貧不能治喪巡撫韓爲捐金賻助親乃得歸

崔紀永濟人康熙五十七年進士授編修雍正四年充福建

鄉試副考官明年充會試同考官七年遷國子監司業丁母憂服闋補原官歷司經局洗馬右庶子授國子監祭酒乾隆元年提督順天學政先是生員沿前明弊俗往往結黨滋事抗糧包訟故立法稍嚴紀以爲近日學規旣已整肅宜蠲除煩苛與之更始因條奏現行事例應停者六應改者二並如所請士林誦之尋遷詹事府詹事授倉場侍郎會甘肅巡撫劉於義被劾

詔與侍郎馬爾泰赴甘查辦詳鞫得實二年四月

命署陝西巡撫旋實授陝屬平原八百餘里農作率皆待澤於天旱則束手無策耆儒王心敬嘗著鑿井灌田說列法甚備紀檄州縣諭民廣行貧者借以庫金半年中得井數千並修復龍洞渠增隄埧設水夫定歲修法於是涇陽醴泉三原

高陵諸縣荷鉅成雲幾復鄭白之舊明年調湖北巡撫奏請  
頒

御注孝經及孝經行義資政要覽性理精義古文淵鑿諸書貯  
書院並刊布以便誦習居二年以事被議革職

特旨降五級調用尋授國子監祭酒充甲子順天鄉試副考  
官旋視學江蘇遭父憂歸十四年服闋授山東布政司明年  
擢副都御史仍提督江蘇學政以病乞休尋卒紀勸學勵行  
安詳儒雅屢膺文學之任喜以經術造士爲國子師最久所  
管易說大學中庸諸說皆以成均課講名之其任封疆時時  
以利濟爲懷關中鑿井督治急切值歲澇溢未覩其利秦士  
大夫競爲蜚語上聞事遂中止及撫楚值楚人困於淮鹽之  
湧貴貧民至以淡食爲常故博採眾議稍更舊法分地行鹽

淮商懼奪其利遂以食私誣之事未奏行而謗言盈廷賴

高宗素知其賢不深罪也

馬聲宇正希長治人康熙丙午武舉吳逆之變聲家居以父之迅佐鎮彝陵遂率家丁馳至鎮分守南城父追賊被創聲割股以進父創重訖不起制府蔡以金革義授援勦右路遊擊聲誓殺賊報父讐將部下二千人轉戰楚粵間功最遷督標副將署總兵事遂率師直抵昆明賊帥郭壯圖開門突出聲佐諸將力禦之賊死亡略盡降其卒數萬滇平調雲南副將制府范令齋邊圖入奏

聖祖知爲忠勳裔顧問移時擢雲南左都督總兵官駐永北鎮永北孤懸金沙江外番羌雜處聲繕城隍謹烽燧修器械明賞罰凡十有五年兵民安堵藁藁諸土司胥奉約束唯謹爲

一 時干城選焉

梁欽構字翊宸介休人孝友謹厚以拔貢舉於鄉康熙丁未成進士授長垣知縣慎恤刑獄尤加意人才丁內艱起補固始縣更著循聲累遷文選司郎中充會試同考官請假歸里四十一年

聖祖西巡道左迎覲

慰問備至

御書引年二字賜之祀長垣固始名宦

王祚興永甯州人丁未進士任陝西三水知縣時兵燹之後地荒民逃額徵歲不及半積逋如山官民交困祚興到官後力請蠲豁無著地丁至屬上官怒終遂其請乃多方招徠民漸復地益墾闢累升至湖廣提學僉事試士公明所在勒石

頌德

董正紳字蒼玉介休人父爾型嘗獨修文廟未竣而卒正紳踵成之天性孝友信孚閭黨郭有道碑久亡延太原傅山爲重摹之歲歉出粟以濟自奉泊如也當事以其有功學校奏請優獎以訓導注選卒祀鄉賢所著有性理集要諸書弟鼎紳望紳並諸生

馬得正字亢宗介休人少穎異有文名壯遊京師受知柏鄉魏相國與

內庭纂修敘績出判夷陵時吳逆變起州當其衝軍需旁午州守令得正獨任供億以功擢銅陵令縣濱江爲築長堤以捍之建石牯時其敢閉善斷獄有斗金不換南山判之頌艱歸起補魚臺值水患濬河廝渠民獲安處而繕城垣興學校

修邑乘次第畢舉遷桂陽知州致仕歸祀魚臺名宦子鍾華  
浙江鹽運使

于準字子繩永甯州人清端公之孫康熙中由蔭生授臨清  
州知州薦卓異遷刑部員外郎歷戶部郎中出爲江南驛鹽  
道調直隸守道遷浙江按察使父憂歸四十二年服闋

特旨授四川布政使明年擢貴州巡撫調江蘇踰年罷歸準  
少服祖訓清節自勵在臨清革火耗鋤強暴吏畏民懷政聲  
甚著陳臬時尤爲浙民愛戴解任奔喪民走訴制府乞題留  
者萬餘人黔省向例錢糧於九月開徵歲終報完州縣考成  
心切急徵累民準請仿內地酌爲寬限自本年九月至次年  
三月內糧米全完者紀錄不全完者處分部議不準行

詔如所請沿邊衛所自改設郡縣均建學校而土人例不得

任流官土司族屬亦不準考試準請於各府州縣立義學將土司承襲子弟以及族屬並苗民俊秀悉令肄業文理明通者由教官彙送學臣考試一體共舉又漢唐以來以土人用爲流官而循良著績見於貴州通志者頗不乏人舊例均宜改正部議以土人無用流官例未便更改餘準行

詔俱如所請土司不法按治之皆警服威惠大行及撫江蘇值秋旱米貴請支藩庫銀赴湖廣買米平糶明年夏久雨傷稼復截留漕米五十萬石以濟民食而淮揚徐三府至次年復大水無麥仍請發帑金賑之先是丹陽縣上下練湖冬春濟運夏秋灌溉利濟甚鉅前撫慕天顏奏以上湖佃種下湖蓄水久之奸民並挖下湖埂隄成田升科遂致傍湖民田水旱無資乃相率請於官願仍以下湖蓄水攤認報錢糧準



既洞悉利病卽疏陳始末盡復初制於是濱湖業戶灌溉有資賦仍如額卽以湖中魚菱出息作歲修涵洞埂堤之費他如奏豁濱海臨江埒田錢糧而請嗣後州縣沿江海埒漲之田並照蘆課例五年一丈分別升除皆規畫久遠至今利賴之

### 聖祖南巡

賜御書敷惠甯人四大字及愷澤三吳滋化雨節旄再世繼清風之句嘉獎之及總督噶禮至勢張甚憚準清直以布政使宜思恭爲準所任疏劾下獄囚以傾準卒以失察論罷雍正三年

詔復其職銜又四年辛

梁紹素永甯州人由監生官福建光澤縣知縣蒞任未數月

哉革陋規每歲省民財約三千餘金其徵糧米則依部斛令  
民間仿製置倉門旋丁父憂時

聖祖駐蹕杭州民裹糧保留者數千人慰止乃已後擢廣東雷  
州府同知崇祀鄉賢

梁纘素永甯州人以歲貢授齊河知縣補文安卒於官齊河  
歲饑發倉粟哺之男女老幼用旗標識俾以次就食因爲濟  
趙牛河築玉龍隄民德之文安當九河巨浸造水車數百具  
挹水注於河種杭稻得米數萬斛又條上制府酌定旗丁圍  
地租法無得意爲子奪由是五府胥視文安例卒祀名宦

張崇樸字譽生介休人由太學知江西鉛山縣多惠政去之  
日民刊棠蔭詩以誌頌後任河南孟縣縣濱河歲興隄工不  
累一人唐韓文公故孟人也而史譌爲南陽後其季子利志

石出土乃求得公墓所在崇樸白於臺使擇其子孫賢者奏  
爲五經博士海內誦之量移商邑建書院修志乘所在政績  
卓著

范三拔字瓊標介休人父永斗與遼左通貨財久著信義  
世祖入關定鼎稔知永斗名卽

召見將授以官以未諳民社力辭

勳 詔賜張家口房地隸內府籍仍互市塞上三拔繼之數著勞

賞資甚渥尋以病歸里居數十年以忠孝教子孫以善良勸  
閭里修郡庠發粟振饑矜全孤寡知與不知無不稱爲君子  
雍正四年崇祀鄉賢

衛立鼎字慎之陽城人康熙癸卯舉人初知盧龍縣行取戶

部郎出爲福州知府以老辭歸立鼎有清操數歷中外所至以廉幹稱在盧龍時于清端成龍方巡撫順天舉廉吏列名第一其後魏尙書象樞巡察畿內至縣立鼎治具以待尙書不食惟啜茗而去曰令飲盧龍一杯水吾亦飲令一杯水耳其爲名卿推重如此

張泰交字公孚陽城人明吏部侍郎慎言從孫辛酉壬戌聯傳進士知太和縣縣附大理郭供億滋繁營卒驕悍至以廳事爲校射場泰交視事有挾弓矢來者禁之不遜則治以法而規地構室俾無得與民錯居道府供億詳歸大理諸隸邑民始蘇居五年擢廣西道監察御史請通選法請賑山東饑民獲賑全活者二十八萬有奇巡視北城見旗民塗殿職官問之則舊嘗稱貸業償數倍者也鞭其背索券毀之宿猾李

三號賽黃彪殺人而誣張乙掌山東道具論如法時奉考選科道各舉所知之命班行謂科道亦宜舉泰交曰若科道出科道門豈復能糾劾吾輩耶左都御史張文端公是之語聞遂

命巡視長蘆鹽政疏引裕商廉聲彌著己卯秋內陞故事臺臣奉差不列名蓋異數也補太僕寺少卿

特命提督江南學政人稱公埒猗氏遂甯二學使云歷大理寺卿副都御史一歲三遷至刑部右侍郎仍令訖學政任癸未春

命巡撫浙江蒞任四日恭遇南幸

賜推誠遇人扇泰交嫺吏務飭練卒伍大閱羅木營毀玉環東洛南麕諸山棚以絕賊艘樵汲又修江塘易土以石立廟

鎮之及

駕再巡浙慰諭有加尋以疾請

特遣中書嚆來視卒

賜卹踰常等

田從典字克五陽城人父雨時邑諸生達於易以理學知名設教天井關學者立碑頌德卒祀鄉賢祠明季寇亂邑人欲迎賊紆禍力斥之闔城人無污賊者既賊至挈幼子及兄遺孤避地度不能兼顧乃棄子負兄子以走賊退求子於草間得之卽從典也五歲能誦三經十歲能文章與故浙江巡撫張泰交同補弟子員張亦有文名時稱田張康熙甲子舉鄉試第二戊辰成進士釋褐後七年授英德知縣以廉惠誓於神英德地瘠苦賦籍不可稽奸民詭計逋逃懦者益困爲盡

革陋例清其籍民困大蘇修眉山書院立宋賢唐介鄭俠洪  
浩祠以風示學者士近百年鮮得解者至是比歲舉於鄉凡  
八九人政成行取入都縣民攀戀追送有踰嶺者四十三年  
授御史疏陳調繁之弊謂督撫請調州縣有秉公調者卽有  
徇私以調者在州縣求調之弊有三曰希圖善地曰規避衝  
地曰預爲卓薦地在督撫濫調之弊亦有三曰曲徇請託曰  
引用腹心曰公行賄賂皆借整飭地方爲名巧投捷徑侵帑  
剝民屢經敗露除江浙等省賦重難征之百有餘縣及邊遠  
煙瘴地請仍舊例調補外其餘槩不許調並嚴定督撫濫調  
之罰又請

勅吏部嗣遇考選科道凡正途出身之部屬及由知縣擢任  
之中行評博與翰林一體論俸開列考選不由堂上官保送

以杜交結營謀之弊均下部議行巡視西城罷鋪墊費查通  
州倉餽祠以居廟祝不受值不入也抑豪強清宿弊毛髮不  
假借聲日起

聖祖知其可大用超擢通政司參議累遷左右通政光祿寺卿  
寺故有招買行戶作姦侵蝕虧經費乃治其黠者仍請限年  
帶銷所虧

持旨允行豁免鉅萬尋擢副都御史五十二年擢兵部右侍  
郎兼管光祿寺前後凡八年不爲操切而句稽甚晰時方議  
武職罷任當回籍擢左都御史會兩江總督長蘅以知州王  
承勳首告安徽布政司年希堯鳳陽知府蔣國正婪取事入  
奏

上命往勘得實希堯國正論如律明年擢戶部尙書繼武進趙



恭毅公後濟以和平六十年主會試得人最盛雍正元年調吏部仍兼管捐納軍需事

世宗御書清謹公方額賜之並

賜御製詩有出納望同天北斗清芬品擬省中蘭之句尋主武會試明年主順天鄉試協辦大學士有

詔停止戶部及陝西捐例並

諭獎從典及尙書張伯行兩年以來辦理清正均下部議敘三年春授文華殿大學士兼吏部尙書每公退危坐讀書訖謨謹密雖子弟莫能知

優旨褒嘉

賜資無虛月四年以疾請老

溫諭慰留六年疾作復請

上鑒其誠

優詔加太子太師原官致仕於居第賜宴令部院堂官齊集並賜帑金五千兩爲途費及高年頤養之資馳驛起程日著廷臣祖餞以寵其行所過地方有司在二十里以內者俱著迎送旋里後令巡撫兩司時至其家存問將來頤養康健一二年後再入京來見及

陞辭

賜御書楹聯暨冠服朝珠等物四月行次良鄉卒年七十有八遺疏至

上震悼遣散秩大臣及侍衛六人往奠茶酒內閣學士侍讀學士各一人往庀喪具

命地方沿途護送

賜祭葬

予謚文端從典學有本原深經術尊信宋儒躬行實踐事親備色養居喪盡禮不作佛事三年不入內父有木枕泣銘以詩攜持行萬里終身不少離當官廉正以至誠結主知故能恩禮始終哀榮大備十二年

諭曰原任大學士田從典品行端直老成廉潔奉國公忠可入賢良祠以風有位並於本家

賜祭一壇子懋

田光復高平人丁丑進士早孤事母盡孝下帷攻苦年五十始登第授鄒縣令鄒衝邑號難治光復絕苞苴嚴令甲訟至立決皆服其平遇大水傷稼貧民賦不登爲捐金代補以歲饑詳請賑給不允會總河至復力言之得粟萬石全活無算

鄒民尸祝之艱歸起補蒲江地瘠民稀招徠撫循一如在鄒時未幾遭疾卒於官

田長文字近庭高平人逢吉孫己丑進士授鎮海知縣下車值海塘衝圯請於上修復之復捐資治土塘易以石三水河舊資灌溉年久淤淺令民分段挑濬建石閘以便蓄洩由是害去利復腴壤相望會有言怨荒蕩及稅漁船者檄下力陳其不便事遂獲已民尤德之署鄞縣歲值荒請弛海禁招商運米當道是其議未幾糧艘腐至米價頓減不煩官賑而民食以足丁父艱起補淳安因病請告大府惜其去不許竟卒於官弟大何字慮庭甲午舉人同知通州循謹有幹略以疾去尋改官長治教諭

張茂生字子發陽城人巡撫璿子由蔭生官戶部主事歷員

外郎郎中以終養歸茂生嗜讀書在戶部勤慎爲曹司最及歸立社倉置義田設蒙經二學延知名士主師席雅崇正學建宋五賢祠刊朱子薛子要錄及魏敏果庸言行於世里居二十七年卒邑人罷市往哭著息齋集丁丑集尙德尙儉諸箴

陳廷慤字素心澤州人性孝友濟物爲懷州向輪羊羖狐皮久爲行戶累力白上官革其弊念鄉民鮮蓋藏出粟爲倡行社倉法後遇歉歲竟賴以濟出仕爲武安令漕米舊由民運人苦負戴廷慤令戶胥齎銀赴河干易米上兌迄今稱便俗健訟好鬪多方導化風氣丕變有耿青天後陳青天之議去官民建祠祀之名一錢亭善書工詩著有南游草歸田錄祀鄉賢子賁懿字白村辛卯舉人選涑水令歷杞縣甯晉並有

治績相人祀之名宦亦有書名著問津詩集

王廷掄字簡菴澤州人由青州通判內擢戶部員外郎轉郎中授汀州府知府在官粒粟寸帛悉取給於家值歲歉設粥食民全活甚眾修文廟置學田濟城河以薦去民繪像祀之晉山東鹽法道大蘇商困艱歸卒於家性耽讀博涉經史嘗著臨汀考王阮亭宋牧仲並亟稱之子鈞工部左侍郎鐘官至監司別有傳弟廷揚

王廷揚字賡菴以貢授戶部員外郎轉郎中乞養歸雍正中補太僕寺少卿轉僉都御史歷宗人府丞通政使進戶部右侍郎改工部左侍郎卒性縝密長於綜核西陲用兵以部郎協理邊餼轉饋數千里嘗先事辦以僉憲駐霸州營田度支出入甚爲怡賢親王所倚任家世饒於財先後捐賑助饑至

數十鉅萬皆蒙

特旨嘉獎服官勤謹盡職用足洵躋卿貳自奉甚簡游處不雜終日衣冠端嚴泊然一無所好居鄉多義舉州人於其沒立祠祀之子鏐

欽賜舉人

母儀字範公陽和衛人以貢士任教諭升長樂知縣弭盜賊除強暴息訟安民循聲特著調繁英德去民爲建祠在英德發倉振饑請幣鹽課逋欠民頌其德如長邑焉

羅光乾字文九天城衛人先世以武功顯父映壇由武進士官副將光乾生而勇毅喜談兵少從軍旅間康熙十七年會勦海寇隨提督楊捷屢著奇功予都督銜越六年授宿遷遊擊累擢真定副將調湖州協值杭嘉湖三郡水災捐俸施粥

力請於中丞具題蠲賑全活甚眾湖人建祠祀焉尋調浙閩督標中軍復調澎湖與平朱一貴之亂乞歸卒於家

熊毓英字俊之朔州衛人康熙壬子舉於鄉家居有行義歲饑煮粥以食餓者捐租焚券人德之選宜城知縣下車除供應汰雜派減耗羨立義學興市集鋤強梗嚴盜賊甫及一載風清弊絕旋致仕歸士民爲勒石紀績

王炳日字暉菴朔州人性穎敏讀書能數行下孝友性成登戊午鄉薦歷高平教諭威遠衛教授以薦遷莘縣知縣歲荐饑發粟振濟多所全活雍正元年領帑續賑勤勩尤至積勞成疾卒士民哭弔累日不絕

史成字薦章朔州人幼卓犖有大志噶爾丹構亂謁大同康總鎮願從行間立尺寸功康奇之令隸麾下積功由把總荐



升至辰州副將勦紅苗突入大小天星等寨自辰至未生擒  
八人馘斬四百九十三人以奇功遷浙江甯台總兵

賜蟒衣一襲大盜陳君元踞巢授將士方略俾相機進勦君  
元授首俘其黨吳周瞿老四王林三等置之法海盜以平浙  
人賴之以上各

秦開基字宜公沁州人幼事孀母以孝聞力學爲諸生糾族  
人修祖墓祀絕宗鄉黨欽之鄰村有客民挾左道設壇說法  
聚黨幾至百人適過之正色斥其惑眾協里長卽日逐出境  
嘗赴省試道值河水漲有瞽者及童子溺焉領囊覓救得脫  
以無貲竟悞試期不願也年七十以歲貢終祀鄉賢子驥丙  
戌進士未仕卒

張大鵠字程九父純修有傳大鵬少穎悟淹貫經史爲文有

根抵登甲子鄉試乙榜教授後進多所成就爲人嚴毅方正周規折矩內行純摯親喪哀毀成疾服未除卒年四十有八崇祀鄉賢子孝揚孝程並進士孝拔孝捷及孫友會友宓俱舉於鄉

吳時謙字益臣文端公瑛長子也少好學能文庚午魁於鄉又四年成進士時文端方督湖廣楚中仕宦有欲假苞苴媚制府者伺時謙歸里具珍寶直萬緡爲贖時謙瞿然曰吾安敢污吾父清德固卻之丙子沁荐饑捐粟振貸平鹽價通煤途皆力言於州守次第行之當補官會丁內艱及文端公薨益淡於仕進竟不謁選大修廟學立敬聖會釐正里社祈報之典凡婚娶喪葬一準諸禮刻節要一書俾鄉里易於遵循沁人至今效之生平忠信仁恕不爲崖岸峭刻慷慨好施願

自奉儉樸如書生見者不知爲貴公子也卒年四十九沁人  
同聲痛惜公請崇祀鄉賢僉曰繼美祖父不愧也

王凝字靜一平定州人康熙癸巳進士授內閣中書雍正初  
升宗人府主事歷戶部員外郎禮部郎中出守成都府除苛  
稅不以錙銖自潤時議安插流民凝條上六事制軍卽以委  
凝措置得所擢陝西榆林道邊地僑野不知學凝立書院修  
廟學延師教課仍請另設木字號中額故榆有科第自凝始  
秦晉沿邊多私食蒙古鹽犯法者眾凝議於秦延榆路晉近  
邊十八州縣皆聽貿易蒙古各分銷河東引領遇歲大祲飭  
所屬開倉振濟又以郡屬貧民多出耕套口請展界至五十  
餘里部議從之著爲令民咸賴焉乾隆十年卒於官百姓擁  
途泣送祀入名宦祀文達公銘其墓

祁文瀚字北溟壽陽人癸巳進士除來安知縣充庚子江南  
同考官以憂去服闋補任江陰地赤繁號難治抵官數月簡  
潔無爲黠者稍稍狡縱訪得數人立拘至重懲之後無敢犯  
者鄉民往往以小忿輕生訐訟不已又命案相驗胥吏藉以  
魚肉家立破文瀚力絕其弊一報卽飛騎往立訊決非沈冤  
未嘗頌繫民帖然服俗爲一變暇則課農桑與耆老話晴雨  
問所疾苦出一諭若吐肝膈治教大行去官後邑人彙刊其  
政蹟顏曰化民錄學使鄧爲之序比諸陸清獻之令靈壽焉

卒祀名宦

張翼字扶九孟縣人乙未進士授衡山知縣衡俗謁新宰皆  
執贄翼峻卻之案牘靡積日夜研訊情法曲當以事罷歸雍  
正六年少宰彭維新以操守廉潔保舉引

見命隨彭清查江南積逋事竣發往河南署湯陰讞巨獄有聲會河決陳留儀封等縣督辦工料以勞績補榮陽歷七年甚著循聲乞養歸圖書數篋而已教授鄉里以終學者稱爲慈山先生

楊敬儒字恆南忻州人庚戌進士任臨湘知縣廉明有幹略下車裁皇長以釐正賦革陋規以省冗費查屯荒以勘開墾政簡刑清百廢俱舉刻鄉約鐸書俾民相告戒居五年邑大治行取御史清操愈厲嘗同彭中丞鵬劾順天學政李文貞公光地奪情時以爲得春秋責備賢者之義他若疏請清丈田畝釐剔漕糧均湖南鄉試恤旗下奴僕皆切中利病云著有三柏堂集

張綸世字卓菴代州人性耿直好讀書詩古文辭皆超絕以

選貢中康熙壬子副榜教習八旗多所成就授南豐知縣治績皆卓異可紀矯發倉粟生全道殪九仁政之大者罷歸講學授徒經史自娛以終其身

李燕生字華宸崞縣人生有異稟年十二以經術自許父喪哀毀骨立人以孝稱由辛未進士授編修教習庶吉士日與同館講貫經義闢抉微奧一時推爲儒宗性恬退不樂仕進引疾告歸足不出戶日從事于性命之學嘗謂客曰中夜久坐自覺胸中空洞無一物而蕩然若有生意此便是仁之本體呈露處蓋其實有所得也生平手不釋卷六經多所發明易尤其所注意者因署其居曰易在著有易集及詩文稿藏于家

馮光裕字叔益代州人康熙辛卯舉於鄉選雲南大姚知縣

累官至湖南巡撫精敏強幹熟於經世之務自縣令至開府  
任苗疆者十餘年廉潔自持遇事有爲其初擢銅仁同知引  
見時會朝議取古州苗

世宗詢苗疆情形光裕敷陳剴切謂愚苗無知不宜盡殺當隨  
機化導令歸版圖又奏請以湖南清浪平溪二衛改隸貴州  
皆嘉納甫就道卽擢思州知府累遷貴州布政討平古州苗  
招徠流亡給以衣食又請蠲額征以甦民困乾隆四年巡撫  
湖南適鎮筸紅苗亂集兵請剿不三月大克之兵未罷而卒  
遣表惟請蠲城緩兩縣租賦無一言及於私

上悼惜之賜祭葬

馮鍾宿字垣拱代州人父夔曾宰靈臺前令稽災多漏籍定  
不可復增鍾宿鬻田助父賑乃徧後省父于甘州會西陲用

兵父以同知參軍事乃持家資五千金奉父伏懷大吏聞之愛其才勸之仕遊京師循例選中書舍人聞父病卽乞假馳至安西父沒扶柩歸哀感行路由是絕意仕進性好施儿育周給無德色教諸子以義方其後子五人咸登科第

賈待聘字席賓夏縣人庚熙甲辰進士性孝友拯貧濟困乙卯謁銓都門分校順天鄉試卷所得皆知名士魏敏果公象樞以三晉偉人稱之除竹山令招集流亡輕徭薄賦勤勞七載卒于官竹人立祠樹碑祀鄉賢

張潤民字膏之夏縣人丙午丁未聯傳進士授內閣撰文中書舍人歷戶禮兩部員外郎郎中出爲河南督學道僉事考滿以參議候補卒於家潤民性醇謹而執守殊懇奉父母以孝聞朔望必祭祭必泣事兄濟民恭甚嘗爲著學喫虧先生



傳在京邸恆徒步間騎蹇驢下直則蕭然授徒如諸生時同  
官賈鳴璽嘗賦詩曰退食會間仍設帳趨朝近見但騎驢爲  
郎同考會試權貴人屬子弟得其卷塗抹幾遍魏敏果公聞  
之詰其廬爲拜於堂下及視學政侃侃克舉其職嘗拆童子  
號久不至已而提調某潛使人來請易蓋有所挾也閩民大  
怒坐堂上冀利刃案問以令旗召之曰吾且以頸血濺若衣  
某大懼再三謝罪乃解豫人謂公而克明爲學政最

王尹方字鶴汀安邑人壬子癸丑聯雋進士由翰林庶吉士  
累官內閣學士兼禮部侍郎雅度清望焜耀班行一時有四  
君子之目管夜

召至禁中講經書敷釋詳剴爲講臣最主庚午江南鄉試疏  
請破例搜落卷得

旨特爲展期校閱率至丁夜事訖嘔血數升得人之盛論者謂自明崇禎庚午西江姜公燕及典南闈試盡收才望士越六十年而復至庚午其甄拔者尙適符云性至孝生母沒以嫡母年高具疏請終養生母故不憚於嫡母者也君子以爲厚卒祀鄉賢

蔡珍字百朋夏縣人舉辛酉鄉試性孝友品端學邃除高平教諭未任卒祀鄉賢

劉喬齡安邑人康熙乙丑進士令江陰詢民疾苦方施行以憂去服闋補武進益加矜慎徵糧立分限法革除羨耗漕務悉罷陋規出入平準歲省耗米萬餘石編審以籍爲定平徭均役惟從民便公餘校藝手定甲乙有蘭陵課士錄風行一時祀鄉賢

景應熊安邑人乙丑進士除東陽令廉靜寡欲折撫張鵬翻  
器重之邑旱荒民多逋賦憲檄催督甚急應熊終不忍敲朴  
陽民建祠樹碑以志惠告歸後四壁蕭然以載籍自娛絕迹  
公庭邑令曾旭嘗曰先生今之法真也名可得而聞人不可  
得而見其歎服如此所著有憶椿錄讀禮撮要讀儒宗旨諸  
書

介孝璿字衡玉解州人給事松年子丙子舉人選海鹽知縣  
甫九月遽卒於官孝璿承家學嗜讀書以閎博聞旣舉於鄉  
益日夜探討不輟嘗仿前人典錄網羅州境暨隸縣故實排  
續成書而田賦鹽政利弊尤覈論者謂其博而能約得史家  
遺法比筮仕亦能以經術飾吏治晉人胥重之

閻堯熙字涑陽夏縣人家貧力學舉丙戌進士授蕪城知縣

邑濱滹沱水溢堯熙爲木槌數千以禦逆流夾隄植柳成陰  
調繁南宮政賦煩劇革除諸弊勒石永禁直督李敏達公衛  
器重之擢晉州知州賑卹災民以數萬計奏循良第一遷知  
青州府調嘉興到郡鋤豪懲猾教民務本風氣一變嘗於廳  
事前種梅數十本名流題詠甚夥及去囊橐蕭然惟書數篋  
補湖北督糧副使旋調江西鹽驛道在任無敢干以私乾隆  
元年授湖北按察使升四川布政使所在吏治肅清雖嚴寒  
酷暑不稍自逸及疾劇猶強起視事語不及私年六十九卒  
於官

杜濱字砥峰平陸人端嚴聰敏博覽羣書乙卯魁於鄉登丙  
戌進士以中書改宣城知縣治劇有能聲行取宗人府主事  
請增定玉牒橫檔至今不易旋擢山西道監察御史數上封

事悉關體要憂起超補吏科給事出授陝西糧道總理西路  
軍需屯政運務邊風塞雨懋著勤勞解組歸田年七十卒著  
有澹廬詩文集同民堂政蹟諸書

宋在詩安邑人辛丑進士以庶常授檢討甲辰分校京闈踰  
年視學四川拔取多知名士歷任銓曹累遷鴻臚少卿清介  
樸誠朱文端沈端恪皆敬重之究心理學獎誘後進辨析經  
傳尤能闡發精蘊著有論語贅言見聞瑣錄懷古堂詩藁乾  
隆丁酉重宴鹿鳴鄉人榮之

郭夢龍安邑人優貢生候補主事事孀母極孝母手生瘍親  
吮之又以背疾臥牀晝夜撫摩三閱月無少倦母歿哀毀過  
度嘔血數升絕而復甦者再邑人建坊祀鄉賢祠  
任紹壚字仲暄河津人少穎敏好讀書明末寇亂兄弟俱被

掠竄以身護兒背受數創兒卒遇害殘亦昏絕賊舍之去乃  
甦負兒尸瘞之復訪贖弟紹玠於西安舉

國朝丁酉鄉試康熙甲辰成進士授長沙令吳逆告變籌辦  
軍需敘功題署長沙府賊陷醴陵紹燝請簡精銳五千獨當  
一隊與大軍共復其城值歲饑軍糧告乏措置得宜兵食以  
裕真授長沙知府嚴飭屬吏加意撫字民稍復業在任歷四  
年凡招降募勇蠲荒勸輸弭盜興學齋送難民收贖入官人  
口諸善政不可殫述後以承訊僞官被議降補綿竹令至則  
城市邱墟日招集商民修理廢墜甫一年以疾卒邑人哀之  
崇祀名宦其歸自長沙也偕族人任宏埏導瓜峪水築隄開  
渠灌漑村田至今利賴著有猶存詩草子度坡園子助教  
楊作楨字翰臣絳州人舉王子鄉試第一丙辰成進士歷官

右春坊右贊善淡泊自甘公餘杜門誦讀不妄交無私謁任  
事剛決不阿權貴纂修工部會典承

命閱批遼金二史校正資治通鑑俱稱職己未會試分闈公  
明服人里居時置學田以贍貧士立社倉以恤鄉族桑梓賴  
之祀鄉賢

張克嶷字偉公自號拗齋聞喜人敦質行遠於經學康熙十  
八年進士選庶吉士改刑部主事累遷郎中有獄連執政族  
人諸司莫敢任克嶷請獨任之內務府以其人出使爲辭鉤  
提益急牒問奉使何地歸何期至再三不答力請於長官謂  
宜入告事雖格閩者肅然尋出守廣西平樂府猺獞雜居盜  
不可詰既至浹月以信義服苗酋獲巨盜二人斃其一宥其  
一責令偵緝終任盜不敢窺改知潮州府屬縣賊蜂起或稱

明裔聚眾千餘人聞之卽日馳至其地命吏士速據白葉祁山設疑兵嚴守而張軍聲賊不敢偪會夜半大風起簡健卒二百斫其營呼曰大兵至矣城中鼓譟出兵以助之賊奔祁山要擊之斬巨魁三人眾敗散乞降巡撫將上其功克疑曰此盜耳而稱明裔與大獄株連多轉恐生變乃以盜案結湖有大豪戕親迎者於路而奪其妻拒捕經年微行迹而得之獄成當大辟監司銜大府命爲之請且曰稍遼緩之當以黃金四百鎰潛至君家克疑曰吾官可罷不可鬻也卒寘諸法或假親王命以開礦大府不敢詰克疑縛執之其人出龍牌眾色然駭克疑命繫之獄以牌申大府情旣得立杖殺之丁父憂遂不出或勸之曰吾性拗幸而得歸畏途可復卽乎年七十有六卒於家



孫子羽字圭一幼孤事母篤孝由己未進士授長垣知縣廉  
介自持民有白菜孫公之號庚午分校北闈尋以協馬違限  
奪官民環衙而泣者萬計復職補通許令除積弊十款撫軍  
集州縣官而囑以孫令爲法

崔靖字小衛聞喜人已未進士授山陽令有政聲淮俗不事  
女紅爲紡車數十握散布民間令家製如式且示荏耄猶桑  
法再任定邊盡革諸陋規攝楚雄篆詳器積逋八百金兩邑  
百姓爭迎大譁戟轅曰此我父母督撫互慰之滇民呼爲崔  
青天分校鄉闈錄解首謝屢中以下六七八人皆滇南知名士  
卒於官

葉思華字實齋聞喜人庚辰進士授縣令歷任高要永定高  
明諸縣以特薦升瓊州府同知歷知高雷二府瓊四面環海

五指山生黎輒爲商民害馭以誠信黎人向化扶老攜幼拜  
署受賜者千百數雷州城北二十里有海塘延袤十餘里逢  
潮汐輒衝突東下隄莫能禦民病之思華察形勢籌機宜捐  
俸修築又鑿石引水向西民田資灌溉者四萬餘畝士庶咸  
戴建祠祀之以年老乞休內轉刑部員外郎辭歸家居手不  
釋卷後學執經請業無虛日

安方升聞喜人以舉人任蔚州學正尋成進士授滕縣令務  
仁慈不事鞭扑滕爲漕河所經每值修築夫役措料俱派累  
里民至是官爲措慮民以不擾歲辛未鄉里大饑多方振卹  
得免流亡入滕名宦又專祠祀焉

楊棻聞喜人永甯子以蔭官興化同知遷馬湖知府解組歸  
辛未歲禱出米賑粥復給戚里麥穀數百石弛窮民田租五

千石又捐千金築城垣居民德之祀鄉賢

崔爾瞻聞喜人以選貢授棗陽知縣四年政成擢永甯知州棗陽民遮道泣留熊文端公賜履爲撰碑志之抵永甯首錄獄囚反覆推勘矜疑者盡釋革耗米刊布鐸書化及墮愚後補延廣知州省刑息訟內艱服除再補武岡爲楚南清白吏第一弟爾仰提學兩浙卒於任訃至痛悼疾作遂卒

劉啟智隰州人康熙己卯拔貢性忠厚和平雅度絕人終其身非禮弗履教授生徒日以講讀爲樂蔬食不充淡如也沒後三十餘年邑人追思其風與劉君塚並以入鄉賢祠請焉李呈桂字芳如隰州人拔貢任臨湘知縣上官有催科不擾理詞得情之褒再任恩平濱海險瘠之地多方撫卹使民有餘力升定番知州吳逆叛不受僞命遁跡山中事平擢黃平

守未幾辭歸

張自興大甯人起行間歷大同總兵都督僉事少材武從軍所至陷陣有俯身奉旗之概馭軍寬嚴互劑軍士愛而畏之自興事母孝翰族從進賦三百金捐協驛馬八匹後卒於官賜祭葬有加

以上各州屬

右康熙年九十六人

山西通志卷一百三十三

山西通志卷一百三十三